

Visoki predstavnik i specijalni predstavnik EU nastavlja bilateralne sastanke sa BiH liderima



<?xml:namespace prefix = o ns = "urn:schemas-microsoft-com:office:office" />

U sklopu razgovora sa najvišim političkim zvaničnicima u BiH, visoki predstavnik i specijalni predstavnik Evropske unije, Miroslav Lajčák, danas se u Sarajevu sastao sa predsjednikom Stranke za BiH i predsjedavajućim Predsjedništva BiH Harisom Silajdžićem.

Na sastanku je bilo riječi o nizu otvorenih pitanja za koja je potrebno pronaći rješenje kako bi BiH i dalje napredovala na svom putu ka ispunjenju obaveza iz Sporazuma o stabilizaciji i pridruživanju, ali i zadatih ciljeva i uslova za tranziciju OHR-a u EUSR. Stoga, neophodno je uložiti dodatne napore na političkom nivou u vezi sa preostalim neispunjenim ciljevima i uslovima. Razmotrena je ideja o održavanju zajedničkog sastanka svih političkih lidera BiH, koju je prošle sedmice podržao i predsjednik SDA Sulejman Tihić. U tom smislu, visoki predstavnik i specijalni predstavnik EU je izrazio očekivanja da će lideri BiH pokazati spremnost da se pronađe prihvatljivo rješenje za pitanje državne i vojne imovine, kao i pravnog položaja Brčko Distrikta. "Država mora imati svoju imovinu kako bi

mogla vršiti svoje ustavne nadležnosti", a s druge strane Brčko Distrikt mora biti pravno zaštićen, kako bi se provela arbitražna odluka, potvrdio je Lajčák.

Razgovarano je i o ustavnim promjenama za koje postoji saglasnost da je neophodno započeti razgovore odmah nakon oktobarskih izbora. Ako postoji spremnost u zemlji, ali i međunarodnoj zajednici, da se pitanje ustavnih promjena više ne može odlagati, onda se treba ozbiljno pripremiti, zaključeno je na sastanku.

Što se tiče nedavnog hapšenja optuženog Radovana Karadžića, Lajčák i Silajdžić su naglasili potrebu za daljnjom saradnjom sa Haškim tribunalom i izručenjem preostalih optuženih Ratka Mladića i Gorana Hadžića.

Nastavljajući bilateralne sastanke sa političkim zvaničnicima, visoki predstavnik i specijalni predstavnik Evropske unije, Miroslav Lajčák, sutra će se sresti sa predsjednikom Izvršnog odbora SNSD-a i članom Predsjedništva BiH Nebojšom Radmanovićem.